

## **МЕСЯЦА ДЕКАБРЯ В 16-Й ДЕНЬ (29 декабря по н. ст.)**

### **Служба Собору святых отцев, в земли Кольстей просиявших**

#### **НА МАЛОЙ ВЕЧЕРНИ**

##### **На Господи, возвах: стихиры на 4. Глас 1:**

Днесь радуйся, душе, и ликуйте, собори празднлюбезнии, / яко до Севера Крайняго и моря Ледоватаго приидоша чада Господня. / Днесь во тме полунощней идольстей возсия благодать веры, / мгла разгнася, свет облиста, / туман разсеяся и взыде Солнце Правды. / Днесь Церковь земли Кольския приносит Богу плоды: / се аз и дети, яже ми даде Бог, // молитвами отцев Кольских, Христе Боже наш, помилуй нас.

Приидите, людие, воспойм собор ангелоподобных, / восприявших веры щит, / отринувших страстей тму, / окрепших в невидимых бранех, / скитающихся в пустынях лопарских, / и в горах, и в пропастех земных, / обративших в бегство полки бесовския, / даже до крове пострадавших / и муки многоразличныя от безбожных претерпевших, / вменивших поношение Христово паче сокровищ мирских, / с любовью припадём к ним, // тех молитвами, Христе Боже, помилуй и спаси души наша.

Взыде к Богу молитва Ангела великия Лапландии, / и в пределах мрачныя Похьелы явися воинство Христово, / провозвестницы благодати, учителя покаяния, / глашатаи жизни вечныя, / вси сии послушествовани быша верою евангельскою, / и стрясе земля Кольская тму мракобесия, / и водрузися на ней Крест Господень: // Церкви красота и демонов язва.

##### **Слава, глас 6:**

Кто не удивится любви вашей к Богу, / о троице равноапостольная, / Феодорите блаженне, Трифоне преподобне, Варлааме всехвальне / со ученики вашими верными! / Вменили бо есте звезду Полярную во звезду Вифлеемскую / и радостно направили есте стопы своя / при бреже Ледоватаго моря в край северныя страны. / Темже народу лопскому добрии пастырие и любящии отцы явились есте, / пустыню непроходную благою вестию огласивше, / выюгу сердечную людей сих усмирили есте, / да воспоёт народ новопросвещенный: // слава в вышних Богу и на земли мир!

##### **И ныне, Богородичен, глас тойже:**

Праведно есть хвалити Тя, мира Владычицу, / яко и месту сему дольному / даровала еси Небес велелепие: / где бо и храмы Ти создашася краснии, / и иконы Твоя чудес исполняхуся. / Мы же, веселящися, прославляем Тя, Мати щедрот, //

подающую мир земли сей и велию милость.

### **На стиховне стихиры, глас 1. Подобен: Небесных чинов:**

Кийми похвалами восхвалим преподобных отцев Собор? / Кийми славословии прославим светносную память их? / Память святых земли нашей явися великое торжество. / Ныне прославльшему вас Христу предстояще, / молитесь о нас прилежно, // любовьию совершающих летное ваше празднество.

**Стих:** Восхвалятся преподобнии во славе / и возрадуются на ложах своих.

Приидите, монашествующих множество днесь, / Трифона, благочестия подражателя, песньми и пеньми восхвалим, глаголюще: / радуйся, преславне Трифоне, земли полнощней пресветлый светильниче; / радуйся, яко Троице предстоиши со ангелы, / Юже непрестанно моли спасти всех отцелюбцев, // достойно тя почитающих.

**Стих:** Священницы Твои облечутся в правду, / и преподобнии Твои возрадуются.

От младенства добродетели прилежав, / сосуд Духа Святаго, преподобне Феодорите, явился еси, / чистоту и целомудрие соблюл еси, / прост и кроток, смирен сердцем, верен Богу, / истинною премудростию просвещен, отче преблаженне, был еси, / сердце свое Христу вверивый, / почестей земных не искавший, / всем помышлением к Богу простиравыйся, // отче Феодорите, моли Христа Бога о нас.

### **Слава, глас 2:**

Приидите, любящие преславныя подвиги святых, / восхвалим преподобнаго Варлаама из Керети, / той бо благобытие мира сего превредил есть / и, живот свой ни во чтоже вменив, крест тяжкий взял, / Христу смирением и доблестию последовал есть. / Мы же прославляем Бога, дивнаго во святых Своих, // подающего нам образ безприкладный и велие надеяние.

### **И ныне, глас тойже:**

Спаси от бед рабы Твоя, Богородице, / яко вси по Бозе к Тебе прибегаем, // яко нерушимей стене и предстательству.

**Тропарі писаны на велицей вечерни.**

**Ектенія малая и отпу́ст.**

## **НА ВЕЛИЦЕЙ ВЕЧЕРНИ**

### **Блажен муж: 1-й антифон.**

**На Господи, возвах: стихиры на 8, глас 8. Подобен: О, преславного чудесе:**

**О,** преславного чудесе, / дивнии угодницы Божии, / яко древа масличная в бесплодней пустыни земли Кольския прозябшии, / нами славословятся днесь. / О, преподобнии мужие, / мученицы и страстотерпцы земель северных, / от родов наших прозябшии, / сеяния небеснаго класы духовнии, / плод сторицею Господу сотворившии, // молитесь за ны, присно убожаемии.

**О,** преславного чудесе, / Кольския земли святых Собор / немолчными песнями и непрестанными славословии восхваляется днесь, / и в молитвах призываются пустынницы и молчальницы, / просветителие и исповедницы, / благочестия и православия истиннаго ревнителие, / тайнницы Божественнии. / О, чуднии угодницы Христовы всехвальнии, / Господеви молитесь // даровати душам нашим мир и велию милость.

**О,** преславного чудесе, / звезды мысленныя в деснице Божией, / над землею Кольскою возсиявшия, / Истины Христовой светильницы, / благодатию веры возжжении, / светом добродетелей ваших озаряете вся, / и в молитвах помощь подаваете, / и на путь спасения наставляете // светоносную вашу память празднующих.

**О,** преславного чудесе, / источницы вод, из сада Едемскаго текущи / и благодатно страну полнощную небесною влагою орошающи, / кладези чудес покажете нам, / присно молебно почитающим вас, / Кольстии велиции угодницы Божии, / не престаните и на будущее время // милости и чудеса изливати до века.

**О,** преславного чудесе, / жителие Града Небеснаго, / подвигом добрым подвизавшиися, / течение скончавшии, веру соблюдшии, / нами воспеваются днесь, / ангельскому лику сопричтостесь, / молитвенницы земли Кольския явистесь: / сего ради, нынешнее приемше наше приношение, // от всякия напасти избавите нас.

### **Ины стихиры, глас тойже:**

**В** чертозех горних, сияющих ныне, / с небесными лики водворилися есте, угодницы Кольстии, / ликовствуете с мудрыми девами совшедшими, / ибо приял есть Владыка Господь / смиренныя рабы Своя во славе / от временных к вечной радости, // Един Благ и Человеколюбец.

**С**вященнейший Собор честных преподобных и богоносных отцев Кольских величаем / и множество преподобномучеников, / лики пострадавших новомучеников

крѣпко почитаѣм, молящеся, / угóдников Твои́х собóри многообразными добродѣтелями освети́шася, / закóну Твоему́ повинующеся, / и наслѣдницы бы́ша обителѣй Твои́х Небѣсных, / Влады́ко Царю́: ихже моли́твами // и нас та́можде всели́ши, Премилостиве.

Я́ко многосвѣтлыя звѣзды добродѣтелей свѣтлостію озаря́ете вѣрных исполне́ния, / преподо́бнии отцы́ на́ши и вси Бо́жии угóдницы земли́ Ко́льския. / Совокуплься Собóр святы́х Твои́х, Го́споди, ра́ди любве́, / и, тоя́ наслажда́ющеся, со А́нгелы лику́ет о Тебе́, Всевидче Го́споди всех: / егóже ликовствовáния да и нас сподо́биши // моли́твами угóдников Твои́х, Всесильне.

### **Сла́ва, глас 2:**

Кѣими славослóвии просла́вим светоно́сную па́мять Ко́льских святы́х? / Челове́цы бо небѣснии и а́нгели земнии́ яви́лися суть, / в земля́х полно́чных добродѣтелями просия́вше. / Воспоѣм вку́пе с дрѣвними отцы́ лики новомучеников и исповѣдников Росси́йских, / до кро́ве Христа́ исповедавших во спасѣ́ние, / заточе́ния, изгна́ния, го́рькия рабо́ты и смерть ра́ди Бо́га сла́дце претерпе́вших, / и возопи́м к ним: те́пле моли́теся ко Го́споду / край наш се́верный в Правосла́вии утверди́ти / и спасти́ ду́ши на́ша, с ве́рою и упова́нием в моли́твах к вам прибега́ющих // и творя́щих свято́е ва́ше пра́зднство.

### **И ны́не, Богоро́дичен, глас то́йже:**

Пре́йде сень закóнная, / благода́ти прише́дши: / я́коже бо купина́ не сгора́ше опаля́ема, / та́ко Де́ва родила́ еси́ и Де́ва пребыла́ еси́; / вмѣсто столпа́ о́гненнаго / пра́ведное возсия́ Со́лнце; / вмѣсто Моисе́я – Христо́с, // спасѣ́ние душ на́ших.

### **Вход. Прокі́мен дне и чтѣ́ния три.**

#### **Притчей чтѣ́ние:**

Па́мь пра́веднаго с похвала́ми, и благослове́ние Господне́ на главѣ́ егó. / Блаже́н челове́к, иже обрѣ́те премудро́сть, и сме́ртен, иже уве́де разу́м. / Лу́чше бо сию́ купова́ти, неже́ли злата́ и сребра́ сокрови́ща. / Честне́йшая же е́сть ка́мений многоце́нных, все же честное́ недостойно́ ея́ е́сть. / Долготá бо дней и ле́та живота́ в десни́це ея́, в шу́йце же ея́ бога́тство и сла́ва. / От уст ея́ исхо́дит пра́вда, закóн же и милос́ть на язы́це но́сит. / Послу́шайте у́бо мене́, о ча́да, честная́ бо реку́, и блаже́н челове́к, иже пу́ти моя́ сохранит: исхо́ди бо мой – исхо́ди живота́, и уготовля́ется хотѣ́ние от Го́спода. / Сего́ ра́ди молю́ вас и предлага́ю мой глас сыновóм челове́ческим. / Я́ко аз, премудро́сть, устро́их сове́т, и разу́м и смысл аз призва́х. / Мой сове́т и утвержде́ние, мой разу́м, моя́ же крѣ́пость. / Аз мене́ любя́щия люблю́, ищущи́и же мене́ обря́щут благода́ть. / Разу́мейте у́бо, незло́бивии, кова́рство, ненаказа́нии же, прилага́йте сердца́. / Послу́шайте мене́ и па́ки, честная́ бо реку́, и отвѣ́рзу от устѣ́н пра́вая, я́ко и́стине поучи́тся горта́нь моя́, ме́рзки же пре́до мно́ю устны́ лживы́я. / С пра́вдою вси глаго́лы уст мои́х, ничто́же в них стро́потно, ниже́

развращенно. / Вся права суть разумевающим и проста обретающим разум. / Научаю бо вас истине, да будет о Господе надежда ваша, и исполнитесь Духа.

### **Притчей чтение:**

Уста праведнаго каплют премудрость, язык же неправеднаго погибнет. / Устне мужей праведных каплют благодати, уста же нечестивых развращаются. / Мерила льстивая мерзость пред Господем, вес же праведный прият Ему. / Идеже аще внидет досаждение, тамо и безчестие, уста же смиренных поучаются премудрости. / Совершение правых наставит их, и поползновение отрицающихся упасет их. / Не пользуют имения в день ярости, правда же избавит от смерти. / Умер праведный, остави раскаяние, наручна же бывает и посмеятельна нечестивых пагуба. / Правда непорочнаго исправляет пути, в нечестие же падает неправда. / Правда мужей правых избавит их: безсоветием же пленяются беззаконнии. / Скончавшуся мужу праведну, не погибнет надежда, похвала же нечестивых погибнет. / Праведник от лова убежит, вместо же его предается нечестивый. / Во устех нечестивых сеть гражданином, чувство же праведных благопоспешное. / Во благих праведных исправится град, и в погибели нечестивых радование. / Во благословении правых возвысится град, усты же нечестивых раскопается. / Ругается гражданином лишенный разума, муж же мудрый безмолвие водит.

### **Премудрости Соломоновы чтение:**

Праведных души в руке Божией, и не прикоснется их мука. / Непщевани быша во очесех безумных умерети, и вменися озлобление исход их, и еже от нас шествие – сокрушение, они же суть в мире. / Ибо пред лицом человеческим аще и муку примут, упование их безсмертия исполнено. / И в мале наказани бывше, великими благодетельствовани будут, яко Бог искуси я и обрете их достойны Себе. / Яко злато в горниле, искуси их и, яко всеплодие жертвенное, прият я. / И во время посещения их возсияют и, яко искры по стеблию, потекут. / Судят языком и обладают людьми, и воцарится Господь в них во веки. / Надеющиеся Нань разумеют истину, и вернии в любви пребудут Ему. / Яко благодать и милость в преподобных Его, и посещение во избранных Его.

### **На литий стихира храма и стихиры святых, глас 1:**

На небесех просвещаеми зарями трисолнечнаго сияния, / святии угодницы Кольстии, / Бога нам ныне благопременна сотворите молитвами вашими, // чистым сердцем вас призывающим.

### **Слава, глас 6:**

Днесь ликует Великая Лапландия, / исполнь небо и земля полнощная благодатию Святаго Духа / ныне в празднование памяти Собора богоносных отец Кольских. / Темже вси, сошедшися, тако рцем: / радуйтесь, благодатнии сосуди Духа Божественнаго, / преподобнии отцы наши Трифоне, Феодорите, Варлааме, /

Евфиміе, А́ксие, Авксѣнтие и Тара́сие, / преподобномученицы Пѣченжстии Ио́но, Германе и Гу́рие / и ѿже с ними сто шестна́дцать мученик Пѣченжских, / такожде новомученицы Цѣркве Ру́сския Моисее и Феодо́ре со ѿними мно́гими, / вас бо Хри́сто́с, яко всепло́дие жѣртвенное, прѣят, / на небеса́ возведе́, иде́же со А́нгелы лику́ете ны́не, / помина́йте лю́бовію ублажа́ющих вас на земли́ // и творя́щих свято́е ва́ше пра́зднество.

### **И ны́не, Богоро́дичен, глас то́йже:**

Богоро́дице, Ты еси́ лоза́ ѿстинная, / возрастѣ́вшая нам Плод живота́, / Тебе́ мо́лимся: моли́ся, Влады́чице, / со все́ми святы́ми земли́ Ко́льския // поми́ловати ду́ши на́ша.

### **На стихо́вне стихи́ры, глас 5:**

Ра́дуйтесь, достосла́внии отцы́, ста́рцы пустыннолю́бви, / поста́ми и моли́твами / блага́та, про́пасти и ка́менія Ко́льския облагоуха́вши; / ра́дуйтесь, немол́чными славосло́вию благода́тно пустыни лопа́рския возде́лавши; / ра́дуйтесь, Ду́ха Свята́го честны́я обите́ли; / ра́дуйтесь, сла́во церко́вная и исправле́ние добродѣ́телей; / ра́дуйтесь, ны́не Хри́сту Влады́це предстоя́щи; / моли́тесь о на́с приле́жно, // лю́бовію соверша́ющих све́тлое ва́ше торже́ство.

**Стих:** Восхва́лятся преподо́бнии во сла́ве / и возра́дуются на ло́жах свои́х.

Ра́дуйтесь, преподо́бнии отцы́ Ко́льстии, / по́двига моли́твеннаго ревни́телие / и благоговѣ́йнаго безмо́лвия сослужите́лие; / ра́дуйтесь, соверше́ннаго терпе́ния зерца́ла / и сосуди́ по́стнаго воздержа́ния; / ра́дуйтесь, единомы́сленнии Бо́жии священнотаи́нницы / и ѿноческаго жити́я украше́ние /; ра́дуйтесь, кра́я полно́щнаго похвало́ и сла́во; / те́мже, соше́дшеся благоче́стно, // светоза́рную ва́шу па́мять че́стно пра́зднуем.

**Стих:** Свяще́нницы Твои́ облеку́тся в пра́вду, // и преподо́бнии Твои́ возра́дуются.

Ра́дуйтесь, блаже́ннии отцы́ святы́и, / в лишѣ́нних на земли́ поживши; / ра́дуйтесь, гла́д и мразъ претерпе́вши; / ра́дуйтесь, ско́рби и поноше́нія терпели́во понѣ́сши; / ра́дуйтесь, яко́ зла́то есте́ искуше́нное от земли́, / очище́нное седмери́цею; / ра́дуйтесь, Влады́це предстоя́щи / и в небеса́х обите́лех ны́не веселя́щиися; / ра́дуйтесь, засту́пницы бо есте́ и предста́телие на́ши ве́рнии, // при́сно восхва́ляем вас лю́бовію.

### **Сла́ва, глас 6:**

Прииді́те, ве́рнии, / духо́вно возвесели́мся днесъ, / яко́ в наро́читом дни пра́здника, / и, ликовству́юще, возопи́м: / преукраша́йся, Фива́йдо Се́верная, / красуй́тесь, пу́стыни и де́бри лапла́ндския, / возрастѣ́вша́я свято́е и сла́вное отцевъ всево́инство, / достохва́льным жити́ем нас наста́вляющее / во след Хри́сту

невозвратно шествовати. / Сего ради в песнях духовных и пений // память вашу светло празднуем.

### **И ныне, Богородичен, глас тойже:**

О, Дево, Мати Благая, Всепетая, / мiрови Покрове и Заступнице, / не остави обители и храмы земли Кольския Своим заступлением, / якоже и во успении мiра не оставила еси, // но спасай вся, на Тя уповающие.

**На благословении хлебов:** тропарь Собора святых, *дважды*. И Богородице Дево, *единожды*.

### **Тропарь, глас 4:**

Светлый сонме подвижников земли Кольския, / Севера тму сиянием веры озаривши, / отцы святii, благочестием преукрашении, / служителие Таин Божиих благоговейнии, / боголюбивии иноцы и учителяе покаяния, / миряне, чистым житием Создателю угодивши, / языка лопскаго богомудрии просветителие и наставницы, / новомученицы и исповедницы, за Христа души положивши, / в горьких работах даже до смерти Его исповедавши, / молитесь ко Господу // спастися душам нашим.

## **НА УТРЕНИ**

**На Бог Господь: тропарь Собора святых (дважды),**

### **Слава, и ныне, Богородичен, глас 4:**

Еже от века утаенное / и Ангелом несведомое таинство, / Тобою, Богородице, сущим на земли явися Бог, / в неслитном соединении воплощаемь, / и Крест волею нас ради восприим, / Имже воскресив первозданного, // спасе от смерти души наша.

### **По 1-й стихологии седален, глас 2:**

Яко странницы и пришельцы есте на краю земли, отметающиеся плотских похотей, яже воют на душу, / и горних обителей всем сердцем вожделяюще, / суеты жития временнаго отrekliся есте, светильницы многосветлии, / чудесы, яко второе солнце, возсияли есте, / поминайте всех нас, совершающих священную память вашу, / и молитесь ко Господу спастися нам, // верою хвалящим память вашу.

### **Слава, глас 3:**

Показаша нам образ вышшаго равноангельнаго жития угодницы твои, Господи, / зело честно быша друзи твои, зело утвердишася владычества их на краю земли полнощныя. / Темже небесными украсившася венцы, с лики безплотных веселятся / и молят Тя, Христе Боже, яко совершеннии совоинственники прехвальнии, // даровати и нам преспеяние жития, чтущим любовию святую память

их.

### **И ныне, Богородичен, глас тойже:**

Пречистая и Преблагословенная Дѣво, / Рождеством Твоим истлевшее страстьми земнородных естество обновися / и, свободяся от смерти и адовых уз, / приведѣся к наслѣдию жизни вѣчныя. // Тѣмже Тя вси рѣди достойно ублажают.

### **По 2-й стихологии седален, глас 6:**

Равноангельное житиѣ показаша нам отцы святїи, / пламень бо огня Божественного в сердце своем стяжавше, / в постничестех и бденных подвигах преспевающе, / почести вышняго града, Небеснаго Иерусалима, достигоша. / Даруй и нам, Господи, ревнительми быти непорочнаго, праведнаго и богочестиваго жителства / и заступлением сих угольников Твоих // неосужденно стати страшному Твоему Судищу.

### **Слава, глас тойже:**

На земли ходивше тѣсною стезею, / отвергосте всех красных мира, отцы Кольстїи, / вшедше в покой премирный, течением правым достигоште широты Небесныя, / славяще выну Царя Славы, Господа Вседержителя, / да и Той, призрев на смиренное молѣние наше, / очистит наша души и телеса от всякия скверны плоти и духа // и дарует нам преспеяние жития и веры и разума духовнаго.

### **И ныне, Богородичен, глас тойже:**

Непостижимому и неизреченному, / купно же славному и ужасному таинству вочеловѣчения Бога Слова дивящеся, / в преклонении душ и сердец наших / пред Тобою, Дѣво Пречистая, ликовствующе, взываем: // радуйся, Благодатная, Господь с Тобою.

### **Величание:**

Ублажаем вас, / вси святїи земли Кольския, / и чтим святую память вашу, / вы бо молите за нас // Христа Бога нашего.

### **Псалом избранный:**

Терпя, потерпѣх Господа, и внят ми, и услыша молитву мою. / Постави на камени нозе мой и исправи стопы моя. / Се удалихся, бѣгая, и водворихся в пустыни. / Уподобихся неясоти пустынной. / Бдех и бых, яко птица, особящаяся на зде. / Колѣна моя изнемогоста от поста, / и плоть моя изменися елѣя ради. / Предзрѣх Господа предо мною выну, яко одесную менѣ есть, да не подвижуся. / Все языцы обыдоша мя, и Именем Господним противляхся им. / Благословен Господь, Иже не даде нас в ловитву зубом их. / Хранит Господь души преподобных Своих. / Восхвалятся преподобнии во славе и возрадуются на ложах своих. / Честна пред Господем смерть преподобных Его. / Пойте Господеву, преподобнии Его, и

исповедайте память святыни Его, во всех людех чудеса Его.

**Слава, и ныне: Аллилуия: (Трижды).**

**По полиелѣи седален, глас 7:**

Блажѣни есте, достохвальныйи отцы Кольстии, / путемъ тѣснымъ, болѣзненнымъ и труднымъ шествовасте, / иже добре ходящии о Христѣ и творящии безсмертный плодъ в широту райскую вводими бывають, / светолитиемъ Христовымъ просвещаемии; / сего ради, у Престола Вседержителя предстоюще, молитесь, / да избавит насъ Господь отъ всехъ ловащихъ души наша, // яко ко Господу очи наши, и Нанже точию уповаемъ.

**Слава, глас 1:**

Преподобнии и богоноснии отцы земли Кольския, / предстоящии за ны соборне Христу Богу, / утверждение всемъ вернымъ будете, яже к вамъ припадаютъ, глаголюще: / радуйтесь, плотию на земли, умомъ же на небеси пожившии; / радуйтесь, временною смертию на безконечную жизнь прешедшии; / радуйтесь, Пресвятая Троицы честнии служителие; / радуйтесь, монаховъ мудрии и кротции наставницы; / радуйтесь, яко и насъ наставите къ жизни нестареемъ и присносущней теплыми молитвами вашими.

**И ныне, Богородичен, глас тойже:**

Яко к нерушимей стени и тихому пристанищу, / к покрову Твоему, Преблагословенная Богородице, притекающе, / влаемии волнами житейскихъ попечений, вопиемъ: / Владычице, покрый, соблюди и спаси на Тя уповающия / и улучити веселия со всеми святыми сподоби.

**Степенна, 1-й антифонъ 4-го гласа. Прокимен, глас 4:** Честна предъ Господемъ / смерть преподобныхъ Его. **Стих:** Что воздамъ Господеву о всехъ, / яже воздаде ми? **Евангелие отъ Матфея, зачало 43.**

**По 50-мъ псалмѣ стихира, глас 6:**

Днесь благодать Святаго Духа насъ собра / в празднование памяти Собора богоносныхъ отецъ Кольскихъ, / темже вси, сошедшеся, тако рцемъ: / радуйтесь, благодатнии сосуди Духа Божественнаго, / преподобнии отцы наши Трифоне, Феодорите, Варлааме, / Евфимие, Аксие, Авксентие и Тарасие, / преподобномученицы Печенжстии Ионо, Германе и Гурие / и иже с ними сто шестьнадесять мученикъ Печенжскихъ, / такожде новомученицы Церкви Русския Моисее и Феодоре со иными многими, / вашимъ бо житиемъ благочестнымъ украсися Церковь Русская, / юже Господь таковыми столпы утверди, / да и намъ подастъ благодать Свою // молитвами вашими благомошными.

## **Канон Богородицы со ирмосом на 6 и святых на 8, глас 6:**

### **Песнь 1**

**Ирмос:** *Сеченое, сечётся / море Чермное, / волнопитаемая же изсушается  
глубина, / таяжде купно / безоружным бывши проходима / и всеоружным гроб. /  
Песнь же Богокрасная воспеваеши: // славно прославися Христос, Бог наш.*

**Запев:** *Вси святии земли Кольския, молите Бога о нас.*

*Приидите, вернии, согласно возвеличим Собор святых, на конце края  
полнощного просиявших, / от древних родов и донине в земли нашей полнощной  
Богу послуживших / и присно со Ангелы Того воспевающих: / дивен во святых  
своих Христос Бог наш, славно бо прославися.*

*Светом Невечерним озаряеми, отцы святии, / просвещением Истины землю  
Кольскую удобрили есте / и кровию мученическою напитали есте, / сего ради людие  
возрадовашася зело, / вельми вас почитают и восхваляют, глаголюще: / дивен во  
святых своих Христос Бог наш, славно бо прославися.*

*Иже добродетелей подвижницы, яко истиннии воины Христа Бога, / от  
лопарских пустыней возсияли есте, / отечество горнее паче славы мира сего  
возлюбивше / и желания плотская отвергше, отцы богомудрии, / вся духовная  
стремления своя во смирение Господеви повинули есте, присно поюще Ему: / дивен  
во святых своих Христос Бог наш, славно бо прославися.*

*Сонм светильников светлых, на конце земли просиявших, / на свещнице  
церковней яви Господь, / щедро насеявый святое и славное отцев множество во  
языцех сущих далече. / Яко истиннии воины Христа Бога, / во всяком чине и всяким  
подвигом Тому угодившии и имущии дерзновение ко Святей Троице, / не забудьте  
помяти земное Отечество ваше и молитися о нас, присно поющих Господу: //  
дивен во святых своих Христос Бог наш, славно бо прославися.*

*Яко ангели земнии и человецы небеснии, / огнем Божественным возсияете и  
оживотворите пустыню, / прежде мрачну и бесплодну, / послежде, аки крин  
процветшую и множество инок возрастившую, / сиянием Трисолнечнаго Божества  
ю озарите, / просвещаяще ко спасению и наставляюще душ множество, /  
благодарно вопиющих о подвизах ваших Господу: / дивен во святых своих Христос  
Бог наш, славно бо прославися.*

**Богородичен:** *Вышних сил Превышшая и плотию Безплотнаго Родшая,  
Пречистая Владычице, / Сына Твоего и Христа Бога нашего / со всеми святыми  
земли Кольския моли о спасении душ наших.*

### **Песнь 3**

**Ирмос:** *Господь Сый всех и Зиждитель Бог, / созданное, Безстрастный,  
обнищав, Себе соедини, / и Пасха, за яже хотяше умерети, / Сам, Сый, Себе*

*предпожре: / ядите, вопия, Тело Моё // и верою утвердитесь.*

Веселися, землё Кольская, / в тебе бо плод радости нам процветё, / преподобный Феодорит, благодатию Божией облагоуханный. / Егуже величающе, Христа Бога славим, / преподобного же усердно молим: / моли спастися душам нашим.

От младенства добродетели прилежав, / сосуд Духа Святаго, преподобне Феодорите, явился еси, / чистоту и целомудрие соблюл еси, / прост и кроток, смирен сердцем, верен Богу, / истинною премудростию просвещен, отче преблаженне, был еси, / сердце своё Христу вверивый, / почестей земных не искавый, / всем помышлением к Богу простиравыйся, // отче Феодорите, моли Христа Бога о нас.

Чистоты усердный хранителю, / Божественною любовью, отче, распялемь, / мирскую честь и богатство ни во чтоже вменив, / небесное богатство и славу вечную восприял еси. / Рекоша народи лопстии: Феодорит Русский широко ходит; / тако не убояся тяготы, и долготы путныя, и хлада, / ниже уклонися тамо нечестивых человек сопротивления, / но вся претерпел еси и всех Богу привел еси.

Ещё в телеси тленном пребыв, / безтелесными и невещественными почтен достоинствы, / по воздуху шествия творил еси. / И, яко апостол Павел, восхищаемь был еси во обители небесныя, / идеже видении неизреченными Бог посети тя. / Недужных, притекающих к тебе, благодатию Духа Святаго целил еси, / прокаженных очищал еси, / чувства покаянная в людех пробуждал еси / и многих на путь спасения и веры наставил еси.

Премудрости сокровище быв, преподобне Феодорите, / сердца неверных людей учением твоим просветил еси, благочестия семена насадив. / Темже ты вси, яко учителя премудра, достождно ублажаем и молим: / молися Христу, Емуже от юности поработал еси, / от навет вражиих избавити нас и спастися душам нашим.

**Богородичен:** Огнь Божественный благодатный, Владычице, сниде на Тя, / и Сила Вышняго осеня Тя; / и, яко Матерь Божия и Ходатаица о роде христианстем, молишися о нас: / тем Тя вси величаем.

### **Седален, глас 2:**

Страны полнощныя подвижники благочестия, / земли северныя предстатели теплии явистесья, / отцы преблаженнии, Христа Бога молитесь о нас, / священный ваш Собор почитающих и любовьию вопиющих: / радуйтесь, отцы предивнии, // края Кольскаго и всея Руси похвалю и утверждение. *(Дважды.)*

### **Богородичен, глас тойже:**

Вся упования наша в Тебе, Мати Дево, имуще, молим Тя, / яко святых славу и Владычицу милосердную: / даруй нам, преподобных Твоих ради, грехов исправление / и иноческому житию споспешествуй присно, // подаючи благодать

Свою неоскүдну.

#### Песнь 4

**Ирмос:** Провидев пророк / тайну Твою неизреченную, Христе, провозгласи: / положил еси твердую любовь крепости, Отче Щедрый, / Единородного бо Сына, Благий, // очищение в мир послал еси.

Преподобне отче Трифоне, / мира красоту и славу мирскую от людей отнюд возненавидел еси / и на покаяние изшел еси в край северных земли, / в сокрушении сердечном слезами землю омакая. / Монашеское житие паче возлюбив, ангелом собеседник быти сподобился еси, / чудесы возсия, якоже второе солнце, во греховнем мраце глубоконощия. / Поминай нас, отче всехвальный, совершающих священную память твою и сице глаголющих: / моли Христа Бога спастися душам нашим.

В места дальняя и безвестная пришел еси, отче наш Трифоне, / и невѣдущим Бог тобою познася. / Идеже прелесть почитаема быше, / тамо ныне людем, во тме неверия лежащим, вера Христова тобою даровася, / и обитель велия процвете. / Всех научил еси в Трех Лицах Едино Божество веровати, / темже священную Твою память достожджно ублажаем.

Пути, вводящаго в жизнь, наставник и учитель был еси / и в последних концех северных страны языки просветил еси, породив водою и Духом Святым, / Егоже благодатию недужных целил еси, от грехов тяжких очищая, / и чувства покаянная пробуждал еси, / и многих на путь спасения и веры наставил еси, отче наш Трифоне.

Богомудре отче наш Трифоне, / обитель во имя Живоначальных Троицы осуществовал еси, / юже новопросвещенная страна Кольская послежде возрасти, / тамо монахов множества песнословят и правверную веру хвалят, / покаяющиеся учением Христа, / Егоже моли спастися душам нашим.

Шестнадцать лет апостольски трудился еси, преподобне Трифоне, / и добродетельми, яко лучами солнечными, / просветил еси неверных во стране далече, пусте и непроходне, / идеже не точию учитель и наказатель, но кормитель и строитель был еси, / и всем бысть вся, да всяко некия спасеши. / Темже ты вси достожджно ублажаем и молимся: / молися Христу, Емуже усердно поработал еси, / избавити нас навет вражиих и спастися душам нашим.

**Богородичен:** Безвестная Дево, / Яже Бога неизречно зачещи плотию, / Мати Бога Вышняго, / Твоих рабов молебную службу прими, Всенепорочная, / и Богу Благоутробному принеси.

#### Песнь 5

**Ирмос:** Союзом любве / связуеми, апостоли, / владычествующему всеми себе Христу возложше, / красны ноги очищаху, // благовестующе всем мир.

Приидіте, любящіи пресла́вныя по́двиги святы́х земли́ Ко́льския, / восхва́лим преподо́бнаго Варла́ама из Ке́рети, / той бо благобытіе́ міра сегó превреді́л есть / и, живо́т свой ни во что́же вмени́в, крест тяжкій́ взем, / Христу́ смире́нием и до́блестію послéдовал е́сть. / Мы же прославля́ем Бо́га, Дивнаго во святы́х Свои́х, / подаю́щаго нам мир и ве́лию ми́лость.

Страда́нием у́бо пёрвее́ тяжко́ иску́сился, / в пусты́ни же постомъ́ течéние божéственное соверши́в, / на Небеса́ возше́л еси́ и ны́не Христу́ предстои́ши, Варла́ама, о́тче преподо́бне, / моля́ся тёпле за ны, пою́щия тя.

Ду́ха Свята́го теплото́ю, му́дре, желáние се́рдца твоего́ согре́яв / и зи́му страсте́й умертви́в, / погрузи́л еси́ страсте́й востáние в пучи́не скорбе́й, / священ́ный о́тче Варла́ама, / в ладий́ тэ́сней вози́мь по мо́рю полно́щному, / многоко́зненную си́лу де́монскую низложи́л еси́ / и в конéц немо́щны ты́я показáл еси́, / Небэ́сная же во́инства удиви́в терпéнием своимъ́, / я́ко по́стников подража́тель и преподо́бных сожи́тель, / с ни́миже моли́ся Го́сподеви поми́ловатися душа́м на́шим.

Богонóсе преблаже́нне Варла́ама, / все плотско́е мудрова́ние ду́ху повину́л еси́, / пощéния и изнурéния телéснаго страда́ньми утверди́вся, / я́ко зláто, в горни́ле иску́шено, сия́я, яви́лся еси́, / приятели́ще был еси́ Ду́ха Пресвята́го. / Помина́й нас, чту́щих при́сно па́мь твою́ священ́ную, / умоли́ Го́спода, да ми́лостив нам бу́дет, / во мно́жестве Своея́ бла́гости.

О, тро́ице присноблаже́нная, / равночэ́стнии ста́рцы, заматорéвшии во днех свои́х, Феодорите́, Трифоне́ и Варла́ама, / я́ко еди́но блаже́нство иму́щии от Бо́га, / пречу́дная и предоб́рая версто́, / восхваля́ющих вы́ от всех лю́тых спаса́йте / тёплым предста́тельством ва́шим ко Го́споду.

**Богородичен:** Изравни́тися Содéтелю желáние ми́ вложи́ зми́й вселука́вый, / я́ко плéнника, мя́ восхи́ти. / Тобо́ю же, Пречи́стая, призванъ́ бых, обожи́вся и́стинно, / Ты́ бо, о, Богома́ти, / И́же мене́ Обоживша́го роди́ла еси́.

## Песнь 6

**Ирмо́с:** *Бéздна послéдняя грехо́в обы́де мя, / и, волне́ния не кому́ терпя́, / я́ко Ио́на Влады́це, вопию́ Ти: // от тли́ мя возведи́.*

Приидіте, христолюбивии лю́дие, / восхва́лим ревни́телей и защи́тителей до́блественных оби́тели Печенжския, / Ио́ну скитонача́льника Успенския́ пу́стыни, / вку́пе же и сподви́жника е́го Герма́на, / ти́и бо ве́лию скорбь́ нача́тка зláго разорéния оби́тели прия́ша / и кровь́ свою́ за Христа́ проли́яша, / со́нму преподо́бному́чеников Печенжскихъ́ сопричтэ́ни бы́ша. / Ны́не же предстоя́т Престо́лу Господню́ // и мо́лятся о спасéнии душ на́ших.

Мно́гия ско́рби и страда́ния на земли́ смире́нно претерпéвше, / я́ко во мно́зем иску́шении скорбе́й избы́ток ра́дости ва́ша, / и я́же во глубинé нищета́ ва́ша

избыточествова в богатство простоты вашей, / крест мученический богопокорно понёсше, / ныне на Небеси радости неизречённые наслаждаетесь, / преподобномученицы Ионо и Германе, / и в сонме святых Господа воспеваете. / Того молитесь и нам поприще земное смиренно совершить / и Царствие Божие наследовать.

Телеса́ ваша на растерзание преда́те, блаженнии Ионо и Германе, / духу плоть покоривше, / мечём язвенным и огнём палящим смерть прияша. / Темже, венцы мученические от Господа приемше, / ныне Престолу Божию во Царствии Небеснем предстоите / и молитесь о душах наших.

Песньми Божественными почитаетесь ныне достойно, пастыреначальниче игумене Гурие, / священнойноче Пахомие, иеродиаконе Иосифе, достославне Амвросие / и прочие иноцы, во обители Печенжстей подвизавшиеся / и Христа ради мужественно пострадавшие, / чрез мучения тяжкая и огонь проидёте / и, яко ученицы вернии преподобнаго Трифона и друзи Христовы, / в покой Небеснаго Царствия внидёте.

Приидите, мучениколюбцы, / отцев блаженных прославим, / Печенжских молитвенников, / доблему́дренно во обители земной потрудившихся / и в селениях небесных упокоившихся, / воистину до крове подвизавшихся. / Молим вы, преподобнии мученицы, / сугубыя венцы стяжавшия, // испросите нам у Господа оставление грехов и велию милость.

**Богородичен:** Радости наша Ходатаица явилася еси, Дево, / и благодати приносяще венец любвию, / радуйся, вопием Ти, Благословенная Чистая, похваляюще.

### **Конда́к, глас 3:**

Днесь лик святых, в земли Кольстей Богу угодивших, / предстоит в церкви и невидимо за ны молится Богу, / приидите, христоименитии людие, / память их почтим и возопием к ним: / радуйтесь, отцы преблаженнии Трифоне, Феодорите и Варлааме / со многими нашего края небесными покровители, / вы бо, яко звезды светозарныя, во мраце севера возсияли есте, / словесы и чудесы своими вся просветивше, / и ныне молитесь Господеву / веру Православную zde незыблему соблюсти // и даровати нам велию милость.

### **И́кос:**

Яко благоуханныи крины, прозябшии Божественным рачением, / явились есте, отцы всечестнии, / в земли необетованней, непутней и жаждущей, / плод многосторичью принёсше, / страну сию молитвами и радениями осветили есте / и души мнози ко Христу привели есте; / сего ради ублажаем вас, присно поюще: / радуйтесь, маслины плодовитыя, от рая Господня процветшия; / радуйтесь, светом Христовым от востока духовнаго возсиявшии; / радуйтесь, земли Кольския

предивнии чудотворцы и теплии о нас пред Богом молитвенницы. / Ныне молитесь Господеви веру Православную зде незыблему соблюсти // и даровати нам велию милость.

## Песнь 7

**Ирмос:** *Отроцы в Вавилоне / пещнаго пламене не убоишася, / но, посреде пламене ввержени, / орошаеми, пояху: // благословен еси, Господи, Боже отец наших.*

Глennaя и земная наслаждения отринув, / пустынное житие возлюбил еси, славный Евфимие, / обители Николо-Корельския украсителю, церквей и скитов многих зиждителю, / в богомыслии и молчании пребывая, / благочестие лику иноческому показал еси предивно, / богоносе Евфимие, отче наш.

Многосветлыми лучами блистают деяния твоя, преподобне отче Евфимие: / брега в последних концах северных страны / церквами и скитами, яко древами маслячными, украсил еси. / Долготу путную и опасности моря ни во чтоже вменяя, / пустынножития рачительство восхваляя, дошед даже до Норвежския земли, / не убоился еси врагов крепких и бранноискусных, / пустыни полнощныя облистав светом благочестия.

Постническое и равноангельное житие приемше, / преподобнии отцы Аксие, Авксентие и Тарасие, / в Поморие пустынное удалилися есте, аки в тихое пристанище, / на наволоку Кашкаранский вселилися есте и многая лета тамо пожили есте / и, непрестанныя молитвы, яко копие в руках, имуще, / крепко победили есте бесовская ополчения, / благодать приемше целити недуги душ и телес наших. / Тем зовем вам: / радуйтесь, преподобнии отцы Аксие, Авксентие и Тарасие, / монахов удобрение.

Троице святая Кашкаранская, / Соловецкаго отока отрасли многоплодная, / в правиле иночестем возсиявшая светло, / преподобнии отцы Аксие, Авксентие и Тарасие, / поминайте, любовью хвалящая вас.

В море Ледоватом успение обрел еси, Безымянне, / в телеси нетление стяжал еси, преподобне, / неведомый миру иноче земли Терския, но Богу ведомый и чудесами явленный. / В ловитве рыбней помощниче скорый и целителю усердный в немощех и болезнях, / преподобне Безымянне иноче, моли Христа Бога спастися душам нашим.

**Богородичен:** *Явилася еси Дева и Мати, паче естества, Богородительнице, / Слово зачешая Отчее, воплощенно Сие рождши, / Имже ныне спасаеми, Тя, Богородице, величаем.*

## Песнь 8

**Ирмос:** *За законы отеческия / блаженнии в Вавилоне юноши,  
предбедствующе, / царюющаго оплеваша повеление безумное / и, совокуплени, имже  
не сваришася огнём, / Державствующему достойную воспеваху песнь: / Господа  
пойте, дела, // и превозносите во вся веки.*

Святїи новомученицы и исповедницы Кольстїи, / светолепнии архиереи и  
священницы, / иноцы, инокини и миряне, / вернии Господеви мужие, жены и чада, /  
на севере жестокии гонители собраннии и в каторжных работах умученнии, / за  
Христа кровь пролившии, / отцы, братие и сестры наши, / за Господа смерть  
приявшии, / испросите у Человеколюбца Бога грехов прощение вопиющим: /  
Господа пойте, дела, и превозносите Его во веки.

Земля северная присно вами хвалится и веселится, / святїи новомученицы и  
исповедницы Кольстїи, ведомии и неявленнии, / в годину лютых искушений Христа  
не отвергостеся, но до смерти Его исповедасте. / Того прилежно молити подати  
велию милость вас чтущим / и Богу вопиющим: Господа пойте, дела, и  
превозносите Его во веки.

Святых Таин Христовых верный служителю, / покаяния проповедниче и края  
Кольскаго печальниче, / уподобился еси пророку Моисею, / душу свою за  
погибающую паству положил еси, / узы темничныя и смерть за Христа претерпел  
еси, / спасай нас молитвами твоими, отче Моисее, вопиющих: / Господа пойте, дела,  
и превозносите Его во веки.

Преподобномучениче Феодоре, / злострадания от безбожных и горькия работы  
претерпел еси, / Церкви послушание даже до смерти явил еси, / сего ради венцем  
мученическим венча тя Христос Бог, / Егоже моли, благодаранный заступниче  
земли Кольския, / да очистимся от всякия скверны покаянием / и прославим Христа  
Содетеля во вся веки.

О, преславнаго чудесе! / Узре Господь гордая времена, / и се, скончана суть, и  
беззакония его исполнишася, / и возсияша с веселием новомученицы в земли  
полнощной, / и мрак прелести неверия отгнаша, / и козни бесовския, яко исчезает  
дым, исчезаюша, / и возрастет правда, и посрамлено бысть нечестие. / Радуются вернии  
и праздник новоявленным угодником составляют, / вопиюще Христу Богу: / Господа  
пойте, дела, и превозносите Его во веки.

**Богородичен:** Зрящи поругание земли Кольския, / скорбяше Пречистая Мати  
и всеильную помощь страждущим людем простираше, / Сына же Своего усердно  
моляше, взываючи: / да благословит Господа земля северная, свободившиися от ига  
безбожнаго, / и превозносит Его во веки.

## Песнь 9

**Ирмос:** Странствія Владычнѧ / и Безсмѣртныя Трапѣзы на Горнем мѣсте / высѳкими умы, / вѣрнии, приидите, насладимся, / возшедша Слова, / от Слова научившеса, // Егѳже величаем.

Процвели есте в постнических юдолах, достохвальнии отцы наши, / яко цвѣти многоцвѣтнии и яко крини сѣлнии, / облагоухали есте души вѣрных добродѣтелями своими и чудесы, / в истинней вѣре наставляюще. / О, всеблаженнии, преподобным сожителіе и постников похвало, / о нас молитеса ко Господу помилватися душам нашим.

Пѣсньми величаем вас, преподобнии, / вся хотѣнія Господни исполнившии, / многія скорби в мире претерпѣвшии, / в молитве Богу собесѣдовавшии, / житіем своим діавола поправшии, / на Небеса со славою возведеннии, / с лики ангельскими в вѣчныя обители Отца Небеснаго вселеннии, / спасайте нас от грехов молитвами вашими, / да утвердимся в вѣре Православней.

Отцы предивнии и всечестнии, / земли Кольския молитвенницы и покровители, / подвигом добрым подвизаетеса, / теченіе жизни дольней скончаете, вѣру свято соблюдете; / ныне, радующеса и веселящеса в преславных селеніях Отца Небеснаго, / почести обетованныя прияете, / не отрините убо и наших молитв, / любовьию вас ублажающих.

Приидите, братіе, с похвалами воспойм полк угѳдников Христовых, / вменивших звезду Полярную во звезду Вифлеѣмскую, / мрѧза и тмы на концѣ края полнощнаго не убоявшихся / и разжженною ревностию козни вражия попавших. / Воинство доблѣстнейшее, священнейший Соборе, / возсияли есте преславно, лучезарныя зари, / и вселилися есте в незаходимый свет Царствія Христова.

Днесь с нами собор постников и молитвенников веселитеса, / преподобных и молчальников сословіе ликовствует, / мучеников и страстотерпцев лик радуется и Бога славит, / и Церковь Христова ими украшается. / Темже, братіе вѣрнии, любовьию прославим вся святыя земли нашея, / яко сыны и дщери Отца Небеснаго, / ко Отечеству вѣчному нас возводящія.

**Богородичен:** Юница Нескверная, Юнца Божественнаго Рѳдшая, / прими молитву рабов Твоих; / да восхваляем Тя, яко Хранительницу земли нашея / и Заступницу всего рода христианскаго.

### Светилен, глас 4:

Свѣтом паче солнца на Небесі божественно блистающе / просветилися есте, вси святіи земли Кольския, / и, Божественным сияніем трисиянным ум свой просвѣщше, / Единаго проповѣдасте Честныя Троицы Христа Господа, / честнии старцы богомудрии, / и Тем землю полнощную озарите, / деяньми славными

насадісте веру Правосла́вную; // сего́ ради вас ублажа́ем. *(Дважды.)*

**Сла́ва и ны́не, глас тойже:**

Днесь всемі́рная ра́дость ве́лия возсія: / дарова́ся цельбоно́сная, Влады́чице, ико́на Твоя́ Тихвинская-Му́рманская. / Все святи́и земли́ Ко́льския ру́ки к ней протира́ют, моля́щися, / и с ни́ми страна́ полно́щная, раду́яся, торже́ствует. / Те́мже мы духо́вно праж́днуем и те́пле вопие́м Ти: / не лиш́и нас Твоея́ ми́лости, // но пребу́ди с на́ми вове́к, Всеблага́я.

**На хвали́тех стихи́ры на 4, глас 8:**

Равночи́слени Трои́цы Несозда́нныя су́ще, / преподо́бнии отцы́ на́ши Феодори́те, Трифо́не и Варлаа́ме, / с ли́ки А́нгелов и ины́ми чи́ны уго́дников земли́ Ко́льския, / раду́ющися, предсто́йте Престо́лу Божества́, му́дрии. / Сего́ ради́ исто́чник исцелéний ве́рным подаёте / и Божéственное просвещéние пребыва́лищу на́шему. / О, уго́дницы Христо́вы досто́славнии, // о нас при́сно моли́теся ко Го́споду.

Изра́ннии от Бо́га святи́и сродни́цы на́ши, / в ми́ре поживши́и, о́баче не от ми́ра су́щии, / вы есте́ соль земли́ на́шея, / ва́ми бо гра́ди и ве́си на́ша освяща́ются, / пу́ти стрóпотныя исправля́ются, / заблуж́дшии к пока́нию обра́щаются, / и вси́ прославля́ют дивна́го во святи́х Свои́х Иису́са Всеси́льна, // Спа́са ду́ш на́ших.

Отцы́ Собора́ Ко́льскаго, / воспéвшии в земли́ се́верней Содéтеля Отца́ Бо́га, / жити́ем своимъ превозне́сшии Всесвята́го Ду́ха, жизнь Подава́ющаго, / Христа́ Влады́ки благове́стие язы́ку ло́пскому проповéдавшии / и во И́мя Святы́я Трои́цы крестивши́и, / моли́теся за ны, отцы́ досто́хвальнии, // по́йте Троеди́наго Бо́га и превозно́сите Его́ во ве́ки.

**Сла́ва, глас тойже:**

Ублажа́ем вас, преподо́бнии отцы́ земли́ на́шея Ко́льския, / вы бо, поучи́вшися день и ночь в зако́не Господни́и, / сподо́бистесь дре́ва живóтнаго снасаждéни бы́ти, / и плод трудо́в и страда́ний ва́ших венцы́ процветé. / Ны́не в сия́нии сла́вы Христо́вой живёте, веселя́щися, / сего́ ради́ досто́хвальную па́мять ва́шу соверша́ем, // в моли́твах по́мощь ва́шу призыва́юще.

**И ны́не, Богородичен, глас тойже:**

Влады́чице, приими́ моли́твы раб Твои́х // и изба́ви нас от вся́кия ну́жды и печа́ли.

**Славосло́вие вели́кое, ектений и отпу́ст.**

## НА ЛИТУРГИИ:

**Прокимен, глас 7:** Восхвалятся преподобнии во славе / и возрадуются на ложах своих. **Стих:** Священницы Твои облечутся в правду, / и преподобнии Твои возрадуются. **Апостол к Галатам, зачало 213.** **Аллилуия, глас 4:** Возваша праведнии, и Господь услыша их, / и от всех скорбей их избави их. **Стих:** Многи скорби праведным, / и от всех их избавит я Господь. **Евангелие от Луки, зачало 24.** **Причастен:** Радуйтесь праведнии о Господе, правым подобает похвала.